

Jako indigeny lud připóznac

Njebjelčicy (SN). Zwjazkowa republika Němska njeje dotal 1989 schwalenu ILO-konwenciju 169 „Dojednanje domoródných a w kmjenach žiwých ludow w nje-wotwisnych krajach“ ratifikowała. Dokument pak je jenički mjezynarodny ludo-prawniski instrument, prawa indigenych narodow zwoprawdźić móc.

Serbski sejm je zwjazkowej kanclerce Angeli Merkel (CDU), zwjazkowemu ministrej nutřkowneho Horstej Seehoferej (CSU), předsydam frakcijow w zwjazkowym sejmje a prezidentej Zwjazkoweje rady Danielej Güntherej wčera próstwu zapodał, zo měła tež zwjazkowa republika ILO-konwenciju 169 ratifikować a tak Serbow eksplicitnje jako „indigeny lud“ w zmysle mjenowaneje konwencije a rezolucije UNO 61/295 „Wozjewjenje wo prawach indigenych ludow“ připóznac.

Wo tym je Serbski sejm nowinarjow wčera informował a zdom na to poka-zał, zo „sydli serbski lud znajmjeńša 1 400 lět wuchodnje Solawy a Łobja jako „prěni narod“. Tohodla po słowach sejmarjow „ILO-konwencija na Serbow přitrjechi. Jeje ratifikacija přez Němsku by prawa indigenych ludow na swěće skrućila.“